



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

DREJTORIA E PËRGJITHSHME PËR TË DREJTËN E INFORMIMIT
DREJTORIA PËR TË DHËNAT E HAPURA DHE KONSULTIMIN PUBLIK

Nr. 1988/1 prot.

Tiranë, më 22.07.2026

REKOMANDIM

Nr. 48, datë 22.07.2026

**MBI ZBATIMIN E LIGJIT NR. 33/2022 “PËR TË DHËNAT E HAPURA DHE
RIPËRDORIMIN E INFORMACIONIT TË SEKTORIT PUBLIK”
NGA AGJENCIA KOMBËTARE E MBROJTJES CIVILE**

Në mbështetje të nenit 19 të ligjit nr. 33/2022 “Për të dhënat e hapura dhe ripërdorimin e informacionit të sektorit publik”,

KONSTATOVA SE:

Zyra e Komisionerit për të Drejtën e Informimit dhe Mbrojtjen e të Dhënave Personale (në vijim “Zyra e Komisionerit”) është institucioni përgjegjës për mbrojtjen, mbikëqyrjen dhe promovimin e së drejtës për ripërdorim të dokumenteve të organeve të sektorit publik, referuar nenit 19, pika 1 e ligjit nr. 33/2022 “Për të dhënat e hapura dhe ripërdorimin e informacionit të sektorit publik” (në vijim “Ligji nr. 33/2022”).

Në zbatim të “Planit të monitorimit të zbatimit të ligjit nr. 33, datë 31.03.2022 “Për të dhënat e hapura dhe ripërdorimin e informacionit të sektorit publik” nga organet e sektorit publik”, për vitin 2026, publikuar në faqen zyrtare të Zyrës së Komisionerit, si dhe Urdhrit nr. 53, datë 11.03.2026 “Për miratimin e “Manualit të monitorimit online dhe metodologjia e vlerësimit të publikimit të të dhënave të hapura nga organet e sektorit publik dhe sipërmarrjet publike””, u krye procesi i monitorimit, me objekt:

- ❖ Monitorim online i faqes zyrtare të Agjencisë Kombëtare të Mbrojtjes Civile, në link-un <https://akmc.gov.al/>, lidhur me përmbushjen e detyrimeve që burojnë nga ligji nr. 33/2022 “Për të dhënat e hapura dhe ripërdorimin e informacionit të sektorit publik” e aktet nënligjore në zbatim të tij.

Komisioneri, pasi shqyrtoi relacionin e monitorimit online nga struktura përgjegjëse dhe provat e administruara gjatë këtij procesi monitorimi, vëren se:

- Ligji nr. 33/2022, në nenin 3 “Fusha e zbatimit”, shkronja “a”, përcakton se: “Ky ligj zbatohet për ripërdorimin e: a) dokumenteve ekzistuese që mbahen nga organet e sektorit publik;”

Në pikën 9 të nenit 6 të ligjit nr. 33/2022 përcaktohet se: “Organet e sektorit publik” përfshin çdo organ të pushtetit qendror, i cili kryen funksione administrative; çdo organ të enteve publike, në masën që ato kryejnë funksione administrative; çdo organ të pushtetit vendor që kryen funksione administrative; çdo organ të Forcave të Armatosura, për aq kohë sa kryejnë funksione administrative, si dhe çdo person fizik ose juridik, të cilit i është dhënë me ligj, akt nënligjor ose çdolloj forme tjetër, të parashikuar nga legjislacioni në fuqi, e drejta e ushtrimit të funksioneve administrative publike.”

Për sa më sipër, në kuptim të ligjit nr. 33/2022, Agjencia Kombëtare e Mbrojtjes Civile konsiderohet Organ i Sektorit Publik dhe duhet të zbatojë detyrimet ligjore sipas dispozitave të mëposhtme të këtij ligji:

- Sipas nenit 6, pika 15: “Të dhëna të hapura” është format i pavarur nga platforma, i vënë në dispozicion të publikut pa asnjë kufizim që pengon ripërdorimin e dokumenteve.”
- Sipas nenit 7, pika 3: “Organi i sektorit publik përcakton listën e dokumenteve ekzistuese që mund të ofrohen në formatin e të dhënave të hapura, të cilën e bën publike.”
- Sipas nenit 9, pika 4” “Organet e sektorit publik dhe sipërmarrjet publike, për aq sa është e mundur teknikisht, i bëjnë të disponueshme të dhënat për ripërdorim menjëherë pas mbledhjes, përmes ndërfaqeve të përshtatshme API, në formë dinamike ose kur është e përshtatshme, si një shkarkim i vetëm voluminoz (bulk download).”
- Sipas nenit 10, pikat 1, 2 dhe 5:
 - “1. Ripërdorimi i dokumenteve, si rregull, ofrohet pa pagesë.
 - 2. Ripërdorimi i dokumenteve mund të bëhet kundrejt një tarife për të mbuluar kostot shtesë për arsye të riprodhimit, ofrimit e shpërndarjes së dokumenteve, për anonimizimin e të dhënave personale, si dhe për masat e marra për të mbrojtur informacionin sekret tregtar.
 - 5. Për çdo rast ku aplikohet tarifa, metodologjia, masa dhe përdorimi i tarifës duhet të përcaktohen me vendim të Këshillit të Ministrave. Organi i sektorit publik që aplikon tarifa për të drejtën e ripërdorimit e bën atë publike në faqen e vet të internetit, si dhe në portalin unik qeveritar të të dhënave të hapura.”
- Sipas nenit 11, pika 2: “Ripërdorimi i dokumenteve është i hapur ose kundrejt aplikimit të licencës standarde. Në rastin e aplikimit të licencës standarde, licenca ofrohet në formatin elektronik sipas modelit të miratuar me udhëzim të përbashkët të ministrit përgjegjës dhe Komisionerit për të Drejtën e Informimit dhe Mbrojtjen e të Dhënave Personale.”

- Sipas nenit 12, pika 1: *“Me qëllim lehtësimin e kërimit të të dhënave të hapura të ofruara nga organet e sektorit publik, krijohet/funksionon portali i të dhënave të hapura qeveritare. Ky portal krijohet dhe administrohet nga AKSHI.”*

Në interpretim të këtij neni, organet e sektorit publik duhet të mundësojnë ndërveprimin me portalin e të dhënave të hapura qeveritare opendata.gov.al.

- Sipas nenit 16, pika 1: *“Në grupin e të dhënave me vlerë të madhe përfshihen të dhëna në fushat:*
b) mjedisore dhe të vëzhgimit të tokës;
.....”

- Sipas nenit 17, pikat 1 dhe 2:

1. *“Për çdo kategori të të dhënave me vlerë të madhe për ekonominë dhe shoqërinë nga organi/et publike përgjegjëse, në koordinim me Komisionerin për të Drejtën e Informimit dhe Mbrojtjen e të Dhënave Personale, përcaktohen grupet specifike të këtyre të dhënave.*
2. *Grupet specifike të të dhënave me vlerë të madhe duhet të jenë:*
 - a) të disponueshme pa pagesë;*
 - b) të lexueshme nga kompjuteri;*
 - c) të ofruara përmes API-ve; dhe*
 - ç) kur është me rëndësi, të ofruara si një shkarkim i vetëm.”*

- Udhëzimi i përbashkët i ministrit të Ekonomisë, Kulturës dhe Inovacionit dhe i Komisionierit për të Drejtën e Informimit dhe Mbrojtjen e të Dhënave Personale nr. 2, datë 6.2.2025 *“Për miratimin e licencës standarde të ripërdorimit të informacionit të sektorit publik”*, përcakton këto detyrime kryesore për organet e sektorit publik:

- ✓ Sipas Kreut II, Fusha e Zbatimit, shkronja “a”: *“Ky udhëzim zbatohet nga organet e sektorit publik, për ripërdorimin e dokumenteve ekzistuese që mbahen prej tyre, në kuadër të detyrës publike.”*
- ✓ Sipas Kreut III, pika 2: *“Licenca do të jetë në format elektronik dhe do të shoqërojë informacionin që do të publikohet nga organet e sektorit publik dhe sipërmarrjet publike në faqet e tyre zyrtare dhe në portalin opendata.gov.al.”*
- ✓ Sipas pikës 5: *“Organet e sektorit publik dhe sipërmarrjet publike do të bashkëpunojnë me Agjencinë Kombëtare të Shoqërisë së Informacionit lidhur me implementimin e licencave në formatin elektronik, për dokumentet në formatin e të dhënave të hapura, në faqet e tyre zyrtare dhe në portalin opendata.gov.al, ripërdorimi i të cilave kërkon aplikimin e licencës standarde.”*
- ✓ Sipas Kreut V, pika 2: *“Ky udhëzim zbatohet nga organet e sektorit publik, sipërmarrjet publike në Republikën e Shqipërisë dhe Agjencia Kombëtare e Shoqërisë së Informacionit.”*

Në përmbushje të këtyre përcaktimeve ligjore vlerësohet se Agjencia Kombëtare e Mbrojtjes Civile luan një rol të rëndësishëm në krijimin dhe publikimin e të dhënave në fushën e mjedisit, e cila është një kategori të rëndësishme e të dhënave me vlerë të madhe, referuar neneve 16 dhe 17 të ligjit nr. 33/2022.

Agjencia Kombëtare e Mbrojtjes Civile (në vijim “AKMC”) është institucion qendror në varësi të ministrit përgjegjës për mbrojtjen civile dhe përgjigjet për zvogëlimin e riskut nga fatkeqësitë dhe mbrojtjen civile, në të gjithë territorin e Republikës së Shqipërisë. AKMC-ja ushtron autoritet koordinues, bashkërendues, drejtues, teknik, mbikëqyrës dhe kontrollues në fushën e zvogëlimit të riskut nga fatkeqësitë dhe mbrojtjen civile. Veprimtaria e AKMC-së rregullohet me ligjin nr. 45/2019 “Për mbrojtjen civile” dhe VKM nr. 747, datë 20.11.2019 “Për organizimin dhe funksionimin e Agjencisë Kombëtare të Mbrojtjes Civile” si dhe akte të tjera nënligjore që përcaktojnë kompetencat e këtij institucioni.

Referuar akteve ligjore e nënligjore që rregullojnë veprimtarinë e këtij organi të sektorit publik, si dhe referuar ligjit nr. 33, datë 31.03.2022 “Për të dhënat e hapura dhe ripërdorimin e informacionit të sektorit publik”, janë evidentuar dokumentet ekzistuese/të dhënat, që ky institucion duhet të publikojë në faqen zyrtare si të dhëna të hapura.

AKMC-ja ka detyrimin ligjor për publikimin e dokumenteve dhe të dhënave publike që mban dhe prodhon referuar akteve ligjore e nënligjore që rregullojnë veprimtarinë e këtij institucioni, në format të hapur (*open data*), të lexueshëm nga kompjuteri, të aksesueshëm dhe të ripërdorshëm, së bashku me *metadata*-n, sipas përcaktimeve të ligjit nr. 33/2022.

Në kuadër të zbatimit të detyrimeve ligjore të mësipërme dhe detyrimeve të ligjit nr. 33/2022, Zyra e Komisionerit ka kryer monitorimin online të faqes zyrtare të Agjencisë Kombëtare të Mbrojtjes Civile, konkretisht rubrikave dhe përmbajtjes së tyre bazuar në dimensionet e vlerësimit të këtij procesi të monitorimit online, referuar “*Manualit të monitorimit online dhe metodologjia e vlerësimit të publikimit të të dhënave të hapura nga organet e sektorit publik dhe sipërmarrjet publike*”.

Nga monitorimi i faqes zyrtare të AKMC-së, në *link*-un: <https://akmc.gov.al/>, për përmbushjen e detyrimeve që burojnë nga ligji nr. 33/2022, rezulton se:

1. Agjencia nuk ka krijuar një rubrikë të dedikuar për të dhënat e hapura dhe nuk ka publikuar një listë të dokumenteve që mban e prodhon, që mund të ofrohen në format të hapur sikurse kërkohet nga neni 7, pika 3 i ligjit nr. 33/2022.
2. Në faqe në menunë kryesore ekzistojnë rubrika të cilat kanë të listuara në mënyrë të shpërndarë dokumente të ndryshme që duhet të publikohen referuar fushës së saj të përgjegjësisë.
3. Nga verifikimi i përmbajtjes së këtyre rubrikave konstatohet se ato përmbajnë informacion/listë lidhur me dokumentet/të dhënat që duhet të mbledhë/përpunojë /krijojë/prodhojë dhe publikojë kjo Agjenci referuar detyrimeve ligjore sipas fushës së saj të përgjegjësisë. Nëse klikojmë mbi emërtesën e çdo dokumenti të

listuar në këto rubrika kostatohet se ato ofrojnë informacion të publikuar të fragmentizuar e të papërditësuar.

4. Përsa i përket formatit të dokumenteve, rezulton se nuk janë në formate të hapura, të lexueshme nga kompjuteri, referuar detyrimeve ligjore që duhet të përmbushë kjo agjenci.

Lidhur me konstatimet e mësipërme, bazuar në kërkesat e ligjit nr. 33/2022, më poshtë paraqitet situata konkrete pas verifikimit të përmbajtjes së rubrikave të publikuara në faqen zyrtare të AKMC-së.

- ❖ Në menunë kryesore “Mbrotjtja civile” ka si nënmenu “Përballimi i Fatkeqësive”, e cila në përmbajtje të saj ka rubrikat:
 - Tërmete, ka në përmbajtje informacion narrativ në lidhje me masat që duhen marrë para, gjatë dhe pas tërmetit;
 - Përmbajtje, ka në përmbajtje informacion narrativ në lidhje me masat që duhen marrë para, gjatë dhe pas përmbajtjes;
 - Zjarre në pyje, ka në përmbajtje informacion narrativ në lidhje me parandalimin dhe masat që duhen marrë në rast të ndodhjes së zjarrit në banesë dhe në pyll;
 - Rreziqet biologjike, nuk ka asnjë dokumentacion/të dhënë të publikuar;
 - Rreziqet teknologjike, nuk ka asnjë dokumentacion/të dhënë të publikuar;
 - Bllokimi nga dëbora, ka në përmbajtje informacion narrativ në lidhje me masat që duhen marrë para, gjatë dhe pas bllokimit nga dëbora;
 - Rrëshqitje terreni, ka në përmbajtje informacion narrativ në lidhje me veprimet që duhen ndërmarrë në rastet e rrëshqitjes së terrenit;

E njëjta përmbajtje, me të njëtat të dhëna, për përmbajtje, tërmete, bllokimi nga dëbora, rrëshqitje toke dhe zjarre gjenden edhe në rubrikën “Fatkeqësitë” në faqen kryesore.

- ❖ Në menunë Programi i Transparencës, në seksionin për Informacion mbi buxhetin dhe të dhënat financiare të AKMC-së, në përmbajtje të saj ka:
 - Informacion mbi buxhetin dhe të dhënat financiare të AKMC-së, për vitet 2023-2025, ka informacion tabelar, të ruajtur dhe publikuar në formatin .docx;
 - Monitorimi 2023, ka informacion tabelar, të ruajtur dhe publikuar në formatin .pdf;
 - Monitorimi 2024, ka informacion tabelar, të ruajtur dhe publikuar në formatin .pdf;
 - Relacion Monitorimi 12- mujori 2023, ka informacion narrativ, tabelar dhe grafikë, të ruajtur dhe publikuar në formatin .pdf;
 - Relacion Monitorimi 12-mujori 2024, ka informacion narrativ dhe tabelar, të ruajtur dhe publikuar në formatin .pdf;
 - Dokumente që tregojnë gjendjen e shlyerjes së detyrimeve nga subjektet e licencuara, ka informacion narrativ, të ruajtur dhe publikuar në formatin .pdf;

Në seksionin për Informacion për procedurat e prokurimit/procedurat konkurruese të koncesionit/partneritetit publik privat, në përmbajtje të saj ka:

- Regjistri i parashik.18.12.2025, nuk ka informacion/dokument të publikuar;
- Regjistri i realiz.18.12.2025, nuk ka informacion/dokument të publikuar;
- FORMULAR RAPORTIMI PER ZBATIMIN E KONTRATES, nuk ka informacion/dokument të publikuar;
- Regjistri-i-realizimit-te-prokurimeve-publike, për vitet 2021-2023, janë të publikuar si tabelë në formatin pdf;
- Regjistri-i-parashikimeve-te-prokurimeve-publike, për vitet 2021-2023, janë të publikuar si tabelë në formatin pdf;
- Informacion mbi zbatimin dhe monitorimin e kontratave, nuk ka informacion/dokument të publikuar;
- Lista e kontratave të lidhura, ka të publikuar një dokument narrative në formatin pdf;
- Kontrata-te-lidhura-2021-2022-2023, ka të publikuar tabelë në formatin pdf;

❖ Në menunë kryesore “Publikime”, nënmenuja “Hartat”, gjenden të publikuara:

- Përmbajtje 2026, ka të publikuar një hartë që tregon përmbajtjet gjatë muajit janar 2026 në Republikën e Shqipërisë, e publikuar në formatin pdf;
- Hartat e Zjarreve 2026, ka të publikuar harta që tregojnë zjarret gjatë muajit janar, shkurt, mars, prill dhe maj 2026, në Republikën e Shqipërisë, të publikuara në formatin pdf;
- Hartat e Zjarreve 2025, ka të publikuar harta që tregojnë zjarret gjatë muajit janar, shkurt, mars, prill, qershor, korrik, gusht, shtator, tetor, nëntor, dhjetor 2025 dhe zjarret në pyje gjatë vitit 2025, në Republikën e Shqipërisë, të publikuara në formatin pdf;

Të gjitha të dhënat/dokumentet e mësipërme nuk janë në format të hapur. Ato duhet të publikohen si të dhëna statistikore ose hartografike, si të dhëna të hapura dhe në formatin e duhur dhe gjithashtu të përfshihen në listën e të dhënave të hapura të AKMC-së.

Gjithashtu referuar legjislacionit shqiptar, Ligjit nr. 72/2012 “Për Organizimin dhe Funksionimin e Infrastrukturës Kombëtare të Informacionit Gjeohapësinor në Republikën e Shqipërisë”, i ndryshuar, për publikimin e të dhënave të mbledhura apo krijuara nga AKMC-ja, referuar fushës së veprimtarisë e përgjegjësisë, është monitoruar edhe faqja zyrtare <https://geoportal.asig.gov.al/> e cila administrohet nga Autoriteti Shtetëror për Informacionin Gjeohapësinor (neni 11, 24, etj).

Referuar websitit: <https://geoportal.asig.gov.al/>, ku publikohen të dhëna gjeohapësinore rezultojnë se Agjencia Kombëtare e Mbrojtjes Civile, është identifikuar si Autoritet Përgjegjës për Temën: “Zona me rreziqe natyrore” me Vendimin Nr. 6 datë 5.04.2017, për të cilën në Gjeoportalin Kombëtar gjejmë të publikuara të dhënat si më poshtë:

❖ Në rubrikën Harta/ Tema: “Zona me rreziqe natyrore publikuar në linkun: <https://geoportal.asig.gov.al/map/?auto=true>; janë publikuar:

- Zonat me rreziqe natyrore, Zjarret 2025, në linkun:
<https://geoportal.asig.gov.al/geonetwork/srv/alb/catalog.search#/metadata/81763c6c-d10b-42b0-b321-8b1d2d0b8499>
- Zonat me rreziqe natyrore, Zjarret 2024, në linkun:
<https://geoportal.asig.gov.al/geonetwork/srv/alb/catalog.search#/metadata/2f573a65-7d12-42a9-834c-e8dfc73ad39a>
- Zonat me rreziqe natyrore, Zjarret 2023, në linkun:
<https://geoportal.asig.gov.al/geonetwork/srv/alb/catalog.search#/metadata/46087820-7a85-418a-b339-fe1b72f9d0d5>
- Zonat me rreziqe natyrore, Zjarret 2022, në linkun:
<https://geoportal.asig.gov.al/geonetwork/srv/alb/catalog.search#/metadata/caee13a4-4ac6-4194-871d-8cb00a1d91d9>

Publikimi i këtij informacioni është në format të hapur dhe i shoqëruar gjithashtu me *metadata*, në përputhje me përcaktimet e ligjit nr. 33/2022.

5. Në faqen e Agjencisë nuk gjendet e publikuar logoja e licencës që përcakton kushtet e ripërdorimit, referuar detyrimeve të “Udhezimit të përbashkët nr. 2, datë 6.2.2025 “Për miratimin e licencës standarde të ripërdorimit të informacionit të sektorit publik.”
6. Nga verifikimi në portalin opendata.gov.al, nuk konstatohen të dhëna apo dokumente të publikuara nga AKMC lidhur me veprimtarinë e saj.

Referuar në monitorimin e mësipërm të faqes zyrtare të AKMC-së, në praktikë evidentohet kryesisht publikimi i dokumenteve në formatin pdf, ndërsa nuk konstatohet publikim sistematik i të dhënave në formate të hapura dhe të ripërdorshme (CSV, XLSX, JSON, XML, GeoJSON, WMS/WFS).

Në shumicën e rasteve ligji nuk thotë shprehimisht “AKMC publikon dataset-in”, por krijon detyrimin për:

- ✓ mbledhjen e të dhënave;
- ✓ administrimin e databazave;
- ✓ hartimin e vlerësimeve dhe hartave të riskut;
- ✓ monitorimin dhe raportimin e treguesve;
- ✓ informimin e publikut dhe komuniteteve të rrezikuara.

Këto janë dokumente/të dhëna që, sipas logjikës së ligjit nr. 33/2022 dhe standardeve të të dhënave mjedisore, duhet të vlerësohen nëse janë bërë të disponueshme në mënyrë aktive, të aksesueshme dhe në format të hapur.

Referuar këtij procesi monitorimi dhe vlerësimi, bazuar në dokumentin “*Metodologjia e vlerësimit të publikimit të të dhënave të hapura nga Organet e Sektorit Publik dhe Sipërmarrjet Publike*”, rezulton një nivel “Përputhshmërie e ulët” e këtij organi të sektorit publik, në zbatimin e ligjit nr. 33/2022.

Ligji nr. 33/2022 përcakton se të dhënat e hapura nuk kanë vetëm funksion informues, por synojnë në mënyrë të drejtpërdrejtë ripërdorimin e informacionit të sektorit publik për qëllime ekonomike, sociale, kërkimore, inovative dhe zhvillimore.

Në këtë kuptim, publikimi i të dhënave në formate të hapura dhe të lexueshme nga kompjuteri synon krijimin e mundësisë që këto të dhëna të analizohen, përpunohen, kombinohen dhe ripërdoren nga aktorë të ndryshëm publikë dhe jopublikë, në funksion të zhvillimit të politikave të bazuara në evidencë, rritjes së transparencës dhe nxitjes së inovacionit digjital.

Në mënyrë të veçantë, të dhënat mjedisore përbëjnë kategori të të dhënave me vlerë të madhe (*high-value datasets*), sipas nenit 16 të ligjit nr. 33/2022 dhe standardeve të Direktivës (BE) 2019/1024, për shkak të ndikimit të tyre të drejtpërdrejtë në mbrojtjen e mjedisit, shëndetin publik, kërkimin shkencor, monitorimin e ndotjes, menaxhimin e burimeve natyrore dhe zhvillimin e shërbimeve digjitale me interes publik.

Për rrjedhojë, mospublikimi i tyre në formate të hapura, të strukturuar dhe të ripërdorshme, në përputhje edhe me përcaktimet e nenit 17 të ligjit nr. 33/2022, kufizon ndjeshëm mundësinë e përdorimit efektiv të informacionit publik nga qytetarët, komuniteti akademik, organizatat e shoqërisë civile, media dhe sektori privat.

Sa më sipër, në zbatim të neneve 7, 9, 10, 11, 12, 17 dhe 19 të ligjit nr. 33/2022,

REKOMANDOJ:

1. Organi i sektorit publik/Agjencia Kombëtare e Mbrojtjes Civile, në menunë kryesore të krijojë një rubrikë të dedikuar për të dhënat e hapura dhe të publikojë listën e dokumenteve dhe të dhënave që prodhon referuar veprimtarisë së saj, në zbatim të nenit 7, pika 3 e ligjit nr. 33/2022 “*Për të dhënat e hapura dhe ripërdorimin e informacionit të sektorit publik*”. Në këtë listë të përfshihen edhe dokumente/të dhëna të publikuara nga ASIG të cilat janë krijuar nga AKMC-ja dhe të bëhet lidhja me publikimin.
2. Dokumentet në këtë listë të jenë në format të hapur/*open data*, të lexueshëm nga kompjuteri, të aksesueshëm dhe të ripërdorshëm, së bashku me *metadata*-n, në zbatim të neneve 9 dhe kushteve të nenit 17 të ligjit nr. 33/2022 “*Për të dhënat e hapura dhe ripërdorimin e informacionit të sektorit publik*”.
Gjithashtu, edhe dokumentet e publikuara në rubrikat e tjera, të cilat përmbajnë të dhëna mbi veprimtarinë e AKMC-së, të publikohen në format të hapur, të lexueshëm nga kompjuteri.
3. Të vendoset në këtë rubrikë logo e licencës CC BY 4.0 për kushtet e ripërdorimit, referuar Udhëzimit të përbashkët të ministrit të Ekonomisë, Kulturës dhe Inovacionit dhe Komisionierit për të Drejtën e Informimit dhe Mbrojtjen e të Dhënave Personale nr. 2, datë 6.2.2025 “*Për miratimin e licencës standarde të ripërdorimit të*

informacionit të sektorit publik”, e në zbatim të nenit 11 të ligjit nr. 33/2022 “Për të dhënat e hapura dhe ripërdorimin e informacionit të sektorit publik”.

4. Dokumentet/të dhënat të publikohen edhe në portalin opendata.gov.al, me *metadata* dhe përditësim periodik, në zbatim të nenit 12 të ligjit nr. 33/2022 “Për të dhënat e hapura dhe ripërdorimin e informacionit të sektorit publik”.
5. Në zbatim të nenit 18 dhe pikës 2 të nenit 19 të ligjit nr. 33/2022 “Për të dhënat e hapura dhe ripërdorimin e informacionit të sektorit publik”, detyrimet e përcaktuara në këtë Rekomandim të plotësohen brenda 90 ditëve nga data e marrjes dijeni.

Ky Rekomandim u shpall sot, më datë 22.07.2026.

KOMISIONERI

Besnik Dervishi